



Veronika Moling, che é stada öna dles mius sógadësses de palê dl SSV Porsenù por set agn é passada chësc ann al CF Südtirol Damen, na squadra de serie A2. Por Veronika é chësc n som che se realisëia. Veronika vëgn cunscidrada öna dles sógadësses plü stersces de Südtirol y do Iris Steinmayr é secunda jona badiota che po se vistì la malia dl CF Südtirol Damen. Te na intervista nes cunta Veronika de sùa vita da sógadëssa de palê.

Can aste pa metü man da sóghé al palê?

I à metü man da sóghé al palê cun i mituns da La Val canche i â ot agn. I à sóghé a La Val por cin'agn alalungia. Da mëte man, canche mi geniturs â salpü che i urô sóghé al palê, spo ne êi bëgn nia massa cuntënc, mo iö ne me à nia lascè demotivé. Sëgn che i sun rovada tan inant à mia familia dër ligrëza.

Çi ó pa di por te le sport dal palê?

Le palê é mia vita. I ne sà nia cí che i fajess ségn sce i ne fóss nia jüda inant sön chësta strada. I ne sun nia buna da me imaginé mia vita zënza.

Te cí scuares aste pa sóghé?

Dô avëi lascè la squadra di mituns, ài sóghé por trëi agn cun la squadra dles ëres dla Val Badia. Canche i sun rovada a Porsenù a scora ai metü man da soghé pro la squadra feminina SSV Porsenù olache i à sóghé por set agn. Chësc é le 15ejimo ann che i sóghi al palê y chësc ann ai inçe cambié squadra: i sun passada dal SSV Porsenù al CF Südtirol Damen (conesciü inçe sciöche Vintl).

Cíodi este pa passada dal SSV Porsenù al CF Südtirol Damen?

Le CF Südtirol Damen, dô cater agn te serie B, à davagné l'ann passè le campionat y é insciö rové te serie A2. I à tres albü la ligrëza da rové inant, da rové plü alalt. De jenà ài iö bele dit de sce al SSV Porsenù. Canche l'aministradù dl CF Südtirol Damen me â telefonè por me damanè da passè al'atra squadra, spo ne savoi atira nia cí fà. I à ponsé do dí, al é stè na dezijiun ria da tó. Mi alenadù (dl SSV Porsenù ndr) me à daidé dër tröp te chël momënt. La poscibilitè da rové te na squadra de serie A2 ne an nia vigne dé. I à spo damanè ai alenadusc dl CF Südtirol Damen sce al ê la poscibilitè, te na squadra de n livel tan alt, da podëi inçe jì deperpo a scora. Ëi m'à dit de sce y iö dit de sce ad ëi.

Podéss chësta tûa pasciun forsc inçe diventè na profesciun?

Chël é ri da dî, deache le palê dles ëres ne é baldi nia cíamò dër conesciü. Chilò da nos, dantadöt tla Val Badia, él bëgn ri, che al pois diventè na profesciun. Mo sce i sun buna da jì inant sön chësta strada podéssel bëgn inçe diventè n bel dé na profesciun.

Te savessel bel da sóghé al palê da profescionista?

Al me savess bëgn bel, mo al n'é sigü nia na profesciun che an po fà por düta la vita.

Çi laur oresseste pa fa?

I oress diventè assistënta dles porsones dejables.

Çi scores aste pa fat?

I à frequentè la scora alta por le sozial a Porsenù. Dedô essi orü jì inant a Desproch tl'université dl sport, mo baldi ne ai nia passè l'ejam de amisciun: a ê inçe na proa da nodè y chël ne é nia n sport te chël che i sun dër buna. Tratan l'invern ài spo laorè sciöche maestra dai schi; n pez ài inçe fat la molera. Sëgn sunsi tla scora provinziala por les profesciuns soziales "Hannah

Arendt" a Balsan, che i stlujarà jö de merz.

Ći sensaziun aste pa porvè da cambié squadra? Te mancëra la squadra dl SSV Porsenù?

La squadra dl SSV Porsenù me manćia dër, deache ëra é stada mia pröma squadra. I à vit tröpes esperiënzes cun chësta squadra y inće cun les sógadësses, che me é dagnëra stades dlungia. Al me manćia inće dër tröp mi alenadù, che me à tres daidé y che me à dè la forza da jì inant. I và gonot a ćiarè pro che mies ex colleghees sóga, deache inće mia só sóga lapro. Mo i sun impò sigüda da avëi tut la dërta dezijun.

Ći sensaziun proeste pa canche te fejes n goal?

Fà n goal ó dì fà n bëgn ala squadra. Y spo é inće dër na gran ligrëza podëi odëi che i sun buna da sóghé al palê.

Aste val'portafortüna?

Mi portafortüna é le numer set, scebëgn che i ne à mai albü na malia cun chësc numer. Dan vigne partita pënsi iö al numer set, n numer che me à bele plü gonot portè fortüna.

Da cí squadra tègneste pa?

I tignî dala Juventus. Sëgn tègni ma plü ala squadra te chëra che i sóghi.

Aste tö n idol?

N idol ne ai mai albü, deache sce an à n idol pron dagnëra da ti fà dô. An crësce y impara trö' de plü sce an crëi te sè instësc.

Ci te aspeteste pa da chësta pröma sajun pro le CF Südtirol Damen?

Le campionat da chësc ann sarà dër ri, porchël messarai dër me impegné. Sce la squadra tègn adöm spo vara sigü da arjunje n bun resultat. La cossa che i speri deplü é che i ne me feji nia mè.

Co ciara pa fora n dé tipich de na sógadëssa de palê?

Tratan les edemes de preparaziun messunse se alenè danmisdé y domisdé. Da sëra podunse

se relassè te idromassaje o te sauna y chël é le plü bel. Scenò é i alenamënc trëi iadi al'edema y le fin dl'edema él na partida. Le palê me tol dër tröp tēmp, mo i à ligrëza y porchël le feji ion.

Te as dit che tûa só sóga pro la squadra feminina dl SSV Porsenù, pro chëra che tö as ince sóghé set agn. Aste bele sóghé n iade cuntra ëra?

Tratan le tēmp de preparaziun a Sterzing él stè n'amichevole cuntra le SSV Porsenù. Iö ne à nia podü sóghé, deache i me à fat me dan da n valgügn mëisc. Te döes edemes saràl le partida de Copa cuntra le Porsenú y dailò messarai plü sigü sóghé cuntra mia só.

Çi efet te fej pa sóghé cuntra tûa só?

Al é n vantaje, deache i sà sciöche ëra sóga. Ëra sóga sön la pert dërta y iö sön la pert ciampa, porchël se gnunse adincuntra. Al sarà sigü na bela batalia.

Él n problem por te avëi püch tēmp lēde?

Nou, dessigü nia. Le palê é düt por me y i ne podess mai renunzié a sóghé.

Él n problem por te ester gonot demez da ciasa?

lō a ciasa sunsi pūch. Al é bel n grüm de agn che i viri demez. I vā ion bindicé a ciasa por odēi sciöche ara ti vā a mia mama, a mi pere y a mi fredesc, mo i ne foss sigü mai buna da vir chilò. Le palê é mia vita y tla Val Badia é les poscibilites da sóghé dēr pūces, porchël me pēnsi che i ne gnarà nia zoruch a ciasa canche i arà rové da jì a scora.

Ćiun é pa to som plü gran?

Mi plü som gran é chël da rové a sóghé tla squadra nazionala. Dan da dui agn me ai bele damanè da fà pert dla nazionala under 21, mo i ê bele massa vedla. Plü co intant ne pēnsi nia ai soms, deache i ne ó nia me fà ilujiuns, scenò dedô me stai mal. I la lasci gnì sciöche ëra vëgn.

Ćiun é pa tū obietifs por le dagnì?

lō ó ciafè n post de laur olache i me stà saurì y sóghé inant al palê. Bel me savessel inće da diventè alenadëssa di mituns. I à bele alenè por n cürt tēmp i mituns sot ai 10 agn chilò a La Val y al me à salpü dēr bel. (Katia Pizzinini/La Usc di Ladins 2009)



(fonte: La Usc di Ladins)